

## 中國鄉治之尙德主義（續第二十一期）

柳詒徵

元初勸農立社事理。條文詳密。第亦未盡施行。據元典章觀之。大德初年。各地所立社長。多有婦人小兒。愚駭之人。蓋立法雖善。而奉行者視爲具文。則其法意必至展轉。亦不獨元代然也。

元典章大德三年四月初六日江西廉訪司據龍興路牒該奉行省劄付准中書省咨爲設立社長事。先據知事張登仕呈近爲體復災傷。到於各處喚到社長人等。係婦人小兒。問得該吏稱說。自至元三十年定立社長。經今五年。多有逃亡事故。爲此不曾申舉。到官未經補替。切詳設立社長勸課農桑。使民知務本興學。校申明孝悌。使彝倫攸敘。糾斥兇頑。檢察非違。使風俗歸厚。皆非細務。今各處社長。多不見年高德劭。通曉農事。爲衆信服之人。大失原立社長初意。乞施行得此合牒。可照依都省咨文內事理。將年高通曉農事之人。立設社長。並不得差占別管餘事。一切教本社人民務勤農業。不致惰廢。仍免本身雜役。毋得以前設立不應並別行差占。致誤農事。將立定社長姓名牒司。

又大德六年正月。日江西湖東道肅政廉訪司承奉御史臺劄付准御史臺咨承奉中書省劄付翰林院侍講學士王中順呈奉省劄付前來賑濟淮東被風潮災傷人戶。當時行省劉左丞御史臺所委官淮東廉訪司張簽事分頭前去各州縣審復賑散三個月糧米。今已俱還揚州攢造文冊候畢。另呈外緣卑職原分通州一州靖海海門兩縣最極東邊下鄉。其間見有旬集人編排引審次序支請。盡係社長居前。里正不預。多有年小愚駭之人。草履赤脛。言語嘲哂。怪而問之。州縣官員同辭而對。目今諸處通例如此。舉

職照得初立社長根源欽奉世祖皇帝聖旨係畫節該諸州縣所集村疇凡五十家爲一社不拘是何諸色人等並行入社令社衆推舉年高諳知農事者爲社長不得差占別管餘事又照得欽奉聖旨隨處百姓有按察司有達魯花赤管民官社長以彰德益都兩處一般歹賊每呵他管什麼已後似那般有呵本處達魯花赤管民官社長身上要罪過者欽此切詳按察司達魯花赤管民官下便列社長責任非輕當時又立學師每社農隙教誨子弟孝悌忠信勤身肥家遷善遠罪故孟子凡言王政必以農桑庠序爲先國家所行摘此二事就委按察廉訪官勸課農桑勉效學校亦此意也社長社師外似迂緩中實緊切況兼至元新格內一款節該社長近年多以差科干擾今後催督辦集自有里正主首使專勸農官司妨廢者從肅政廉訪司糾彈社內有遊蕩好閑不務生理累勸不改者社長對衆舉明量示懲勸其年小德薄不爲衆人信服卽聽推舉易換諸假託神靈夜聚明散凡有司禁治事理社長每季須戒諭使民知畏毋陷刑憲累奉如此卑職伏思自中統建元迄於今日良法美意莫不畢備但有司奉行不至事久弊生社長則別管餘事社司則廢棄不舉以至如逆賊段丑厮輩貫穿數州恣行煽惑無人盤詰皆二事廢墮失其原行之所致也斯乃賑濟丁鄉親所見愚意以爲合行申明舊例令社長依前勸課農桑誠飭遊蕩防察姦非不管餘事則百姓富社師依前農隙闡學教以人倫不敢犯上則刑清民富刑清爲治治本所見如此(下略)

元制既敝明代沿其設立社長之意而變通之有耆宿老人耆民公正等稱備官吏之諷咨理鄉鄰之訴訟。

明會典卷九吏部驗封司關給須知高皇帝御製到任須知冠以勅諭令凡除授官員皆於吏部關領赴任務一一遵行毋得視爲文

到任須知一 目錄廿二耆宿 耆宿幾何賢否若干各開 設耆宿以其年高有德諳知土俗習聞典故凡民之疾苦事之  
易難皆可訪問但中間多有年紀雖高德行實缺買求耆宿名色交結官府或蔽自己差徭或說他人方便蠹政害民故到任之初  
必先知其賢否明注姓名則善者知所勸惡者知所戒自不敢作前弊矣

日知錄今代縣門之前多有榜曰誣告加三等越訴笞五十此先朝之舊制亦古者懸法象魏之遺意也今人謂不經縣官而上訴司  
府謂之越訴是不然太祖實錄洪武二十七年四月壬午命有司擇民間高年老人公正可任事者理其鄉之詞訟若戶婚田宅鬪  
毆者則會里胥決之事涉重者始白於官若不由里老處分而徑訴縣官此之謂越訴也 今州縣或謂之耆民或謂之公正或謂  
之約長與庶人在官者無異

### 勸督農桑

明會典卷十七戶部農桑 洪武二十一年令河南山東農民中有等懶惰不肯勤務農業朝廷已嘗差人督併耕種今出號令此後  
祇是各該里分老人勤督每村置鼓一面凡遇農種時月五更播鼓衆人聞鼓下田該管老人點鬧若有懶惰不下田者許老人責  
決務要嚴切督併見丁著業毋容惰夫遊食若是老人不肯勤督農民窮窘爲非犯法到官本鄉老人有罪

### 旌別善惡

日知錄注宣德七年正月乙酉陝西按察僉事林時言洪武中天下邑里皆置申明旌善二亭民有善惡則書之以示勸懲凡戶婚田  
土鬪毆常事里老於此剖決今亭宇多廢善惡不書小事不由里老輒赴上司獄訟之繁皆由於此 景泰四年詔書猶曰民有息

情不務生理者許里老依教民榜例懲治。天順八年三月詔軍民之家有爲盜賊曾經問斷不改者有司卽大書盜賊之家四字於其門能改過者許里老親鄰人相保管方與除之此亦古者畫衣冠異章服之遺意

### 興賢舉能

明會典卷十三吏部訪舉 洪武十七年令知州知縣等官會同境內耆宿長者訪求德行聲名著於州里之人先從鄰里保舉有司再驗言貌書判方許進呈若不行公同精選者坐以重罪

### 飲酒讀法

明會要鄉飲酒禮 洪武五年四月戊戌詔天下行鄉飲酒禮每歲孟春孟冬有司與學官率士大夫之老者行於學校民間里社以百家爲一會或糧長里長主之年最長者爲正賓餘以齒序每季行之讀律令則以刑部所編申明戒諭書兼讀之

明會典卷二十讀法洪武廿六年令凡民間須要講讀大誥律令勅諭老人手榜及見丁著業牌面沿門輪遞務要通曉法意仍仰有司時加提督 嘉靖八年題准每州縣村落爲會每月朔日社首社正率一會之人捧讀聖祖教民榜文申致警戒有抗拒者重則告官輕則罰米入義倉以備賑濟

觀其條教蓋亦遠本周官近則蒙古鄉各爲治惟德是崇然所謂設耆宿擇老人者仍似出於州縣官之指派較元之有明文令社家推舉社長者大相逕庭且耆宿老人之職務亦無詳細規定惟視詔令所頒爲準以今日法治思想繩之益可斥其專制矣然觀到任須知明云耆宿中間多有年紀雖高德行實缺

買、求、者、宿、名、色、交、結、官、府、或、蔽、自、己、差、徭、或、說、他、人、方、便、足、知、明、祖、洞、悉、鄉、民、情、僞、予、以、事、權、先、務、杜、其、弊、竇、不、似、今、人、甘、受、法、制、之、桎、梏、絕、不、從、鄉、里、小、人、卑、劣、行、爲、著、想、也、居、今、日、而、視、元、明、民、法、之、澆、訛、不、第、無、所、減、損、其、進、步、且、有、什、伯、千、萬、於、數、百、年、前、者、無、端、襲、取、西、法、遽、信、其、集、么、匿、爲、拓、都、卽、無、所、用、其、防、制、此、非、夢、囈、語、耶、明、制、授、權、於、里、老、而、監、督、以、有、司、濫、用、匪、人、至、並、州、縣、官、皆、實、諸、法、而、官、民、鈎、結、朋、比、之、弊、又、因、以、生、蓋、法、制、之、得、失、全、視、人、之、運、用、若、何、長、厚、者、因、以、通、上、下、之、情、巧、黠、者、緣、以、爲、比、周、之、利、法、一、也、而、出、入、天、淵、焉、此、講、法、制、者、所、必、不、可、忘、之、經、驗、也、

日知錄洪熙元年七月丙申巡按四川監察御史何文淵言太祖高皇帝令天下州縣設立老人必選年高有德衆所信服者使勸民爲善鄉閭爭訟亦使理斷下有益於民事上有助於官司比年所用多非其人或出自隸僕規避差科縣官不究年德如何輒令充應使得憑藉官府妄張威福肆虐閭閻或遇上司官按臨巧進讒言變亂黑白挾制官吏比有犯者謹已按問如律竊慮天下州縣纒有此等請加禁約上命申明洪武舊制有濫用匪人者并州縣官皆置諸法然自是里老之選輕而權亦替矣 英宗實錄言松江知府趙豫和昌近民凡有詞訟屬老人之公正者剖斷有忿爭不已者則已爲之和解故民以老人目之當時稱爲良吏 正統以後里老往往保留令丞朝廷因而許之尤爲弊政見於景泰三年十月庚戌太僕寺少卿黃仕揚所奏 明之耆宿老人近於下級司法官吏無與於鄉里組織其鄉里組織別有坊長廂長里長等職以任徭役並編製戶籍

明史食貨志洪武十四年詔天下編賦役黃冊以一百十戶爲一里推丁糧多者十戶爲長餘百戶爲十甲甲凡十人歲役里長一人甲首一人董一里一甲之事先後以丁糧多寡爲序凡十年一周曰排年在城曰坊近城曰廂鄉曰里里編爲冊冊首總爲一圖縹寡孤獨不任役者附十甲後爲畸零僧道給度牒有田者編冊如民科無田者亦爲畸零每十年有司更定其冊以丁糧增減而升降之冊凡四一上戶部其三則布政司府縣各存一焉上戶部者冊面黃紙故謂之黃冊

明會典卷二十戶口 洪武二十四年奏准攢造黃冊格式有司先將一戶定式謄刻印板給與坊長廂長里長并各甲首令人戶自將本戶人丁事產依式開寫付該管甲首其甲首將本戶并十戶造到文冊送各該坊廂里長坊廂里長各將甲首所造文冊攢造一處送赴本縣本縣官吏將冊比照先次原造黃冊查算 所在有司官吏里甲政有團局造冊科斂害民或將各處寫到如式無差文冊故行改抹刁蹬不收者許老人指實連冊綁縛害民吏典赴京具奏犯人處斬若頑民粧誣排陷者抵罪若官吏里甲通同人戶隱瞞作弊及將原報在官田地不行明白推收過割一概影射減除糧額者一體處死隱瞞人戶家長處死人口遷發化外其任收稅運糧之職者復有糧長

日知錄明初以大戶爲糧長掌其鄉之賦稅多或至十餘萬石運糧至京得朝見天子或以人材授官務民之義各有專責然法久弊滋動失初意

明史食貨志其後黃冊祇具文有司徵稅編徭則自爲一冊曰白冊云

又成弘以前里甲催徵糧戶上納糧長收解州縣監收糧長不敢多收斛面糧戶不敢攙雜水穀糠粃兌糧官軍不敢阻難多索公私

爾便近者指嘉靖中有司不復比較經催里甲負糧人戶但立限敲扑糧長令下鄉追徵豪強者則大斛倍收多方索取所至雞犬爲空  
孱弱者爲勢豪所凌耽延欺賴不免變產補納至或舊役侵欠責償新僉一人逋負株連親屬無辜之民死於筆楚囹圄者幾數百  
人且往時每區糧長不過正副二名近多至十人以上其實收掌管糧之數少而科斂打點使用年例之數多州縣一年之間輒破  
中人百家之產害莫大焉

日知錄官德五年閏十二月南京監察御史李安及江西廬陵吉水二縣耆民六年四月監察御史張政各言糧長之害謂其倍收糧  
石違折子女包攬詞訟把持官府累經飭禁而其患少息

蓋官之不德者半民之不德者亦半廢弛侵漁惟徇其便人與法之不可盡恃皆以道德爲轉移之樞也  
有明中葉民治之精神及形式殆皆淪喪所恃以支柱敝漏者惟官治耳陽明大儒挺生斯時倡導民德  
爲術滋夥其撫南贛先以十家牌法爲清鄉之本

王文成全書卷十六十家牌法告諭各府父老兄弟本院奉命巡撫是方惟欲剪除盜賊安養小民所限才力短淺智慮不及雖挾愛  
民之心未有愛民之政父老子弟凡可以匡我之不逮苟有益於民者皆有以告我我當商度其可以次舉行今爲此牌似亦煩勞  
爾衆中間固多詩書禮義之家吾亦豈忍以狡詐待爾良民便欲防姦革弊以保安爾良善則又不得不然父老子弟其體此意自  
今各家務要父慈子孝兄愛弟敬夫和婦隨長直幼順小心以奉官法勤謹以辦國課恭儉以守家業謙和以處鄉里心要平恕毋  
得輕意忿爭事要含忍毋得輒興詞訟見善互相勸勉有惡互相懲戒務興禮讓之風以成敦厚之俗吾愧德政未敷而徒以言教

父老子弟其勉體吾意毋忽

繼以鄉約爲新民之基。

王文成全集卷十七南贛鄉約 吾爾民昔人有言蓬生麻中不扶而直白沙在泥不染而黑民俗之善惡豈不由於積習使然哉往

者新民蓋嘗棄其宗族畔其鄉里四出而爲暴豈獨其性之異其人之罪哉亦由我有司治之無道教之無方爾父老子弟所以訓誨戒飭於家庭者不早薰陶漸染於里閭者無素誘掖獎勵之不行連屬叶和之無具又或憤怒相激狡僞相殘故遂使之靡然日流於惡則我有司與爾父老子弟皆宜分受其責嗚呼往者不可及來者猶可追故今特爲鄉約以協和爾民自今凡爾同約之民皆宜孝爾父母敬爾兄長教訓爾子孫和順爾鄉里死喪相助患難相恤善相勸勉惡相告戒忌訟罷爭講信修睦務爲良善之民共成仁厚之俗嗚呼人雖至愚責人則明雖有聰明責己則昏爾等父老子弟毋念新民之舊惡而不與其善彼一念而善即善人衆毋自恃爲良民而不修其身爾一念而惡即惡人矣人善惡由於一念之間爾等慎思吾言毋忽 一同約中推年高有德爲衆所敬服者一人爲約長二人爲約副又推公正通達明察者四人爲約史精健廉幹者四人爲知約禮儀習熟者二人爲約贊置文簿三扇其一扇備寫同約姓名及日逐出入所爲知約司之其二扇一書彰善一書糾過約長司之 一同約之人每一會人出銀三分送知約具飲食毋大奢取免饑渴而已 一會期以月之望若有疾病事故不及赴者許先期遣人告知約無故不赴者以過惡書仍罰銀一兩公用 一立約所於道里均平之處擇寺觀寬大者爲之 一彰善者其辭顯而決糾過者其辭隱而婉亦忠厚之道也如有人不弟毋直日不弟但云聞某於事兄敬長之禮頗有未盡某未敢以爲信姑書之以俟凡糾過



惡皆例此。若有難改之惡且勿糾使無所容或激而違肆其惡矣。約長副等須先期陰與之言使當自首衆共誘掖獎勵之以與其善念姑使書之使其可改。若不能改然後糾而書之又不能改然後白之官又不能改同約之人執送之官明正其罪勢不能執戮力協謀官府請兵滅之。一通約之人凡有危疑難處之事皆須約長會同約之人與之裁處區畫必當於理濟於事而後已不得坐視推託陷人於惡罪坐約長約正諸人。一寄莊人戶多於納糧當差之時躲回原籍往往負累同甲今後約長等勸令及期完納應承如蹈前弊告官懲治削去寄莊。一本地大戶異境客商放債收息合依常例毋得磊算或有貧難不能償者亦宜以理量寬等不仁之徒輒便捉鎖磊取挾寫田地致令窮民無告去之而爲盜今後有此告諸約長等與之明白償不及數者勸令寬捨取已過數者力與追還如或恃強不聽率同約之人鳴之官司。一親族鄉鄰往往有因小忿投賊復讎殘害良善釀成大患今後一應鬪毆不平之事鳴之約長等公論是非或約長聞之即與曉諭解釋敢有仍前妄爲者率諸同約呈官誅殄。一軍民人等若有陽爲良善陰通賊情販買牛馬走傳消息歸利一己殃及萬民者約長等率同約諸人指實勸戒不悛呈官究治。一吏書義民總甲甲老百長弓兵機快人等若攬差下鄉索求賈發者約長率同呈官追究。一各寨居民昔被新民之害誠不忍言但今既許其自新所占田產已令退還毋得再懷前讎致擾地方約長等常宜曉諭令各守本分有不聽者呈官治罪。一投招新民因爾一念之善貸爾之罪當痛自克責改過自新勤耕勤織平買平賣思同良民無以前日名目甘心下流自取滅絕約長等各宜時時提撕曉諭如踵前非者呈官懲治。一男女長成各宜及時嫁娶往往女家責聘禮不充男家責嫁裝不豐遂致愆期約長等其各省諭諸人自今其稱家之有無隨時婚嫁。一父母喪葬衣衾棺槨但盡誠孝稱家有無而行此外或大作佛事或盛設宴樂傾家費

財俱於死者無益。約長等其各省論約內之人一遵禮制。有仍蹈前非者。卽與糾惡簿內書以不孝。一當會前一日。知約預於約所。灑掃張具於堂。設告諭牌及香案。南向當會日。同約畢。至約贊鳴鼓。三衆皆詣香案前。序立北面。跪聽約正讀告諭。畢約長合衆揚言曰。自今以後。凡我同約之人。祇奉戒諭。齊心合德。同歸於善。若有二三其心。陽善陰惡者。神明誅殛。衆皆曰。若有二三其心。陽善陰惡者。神明誅殛。皆再拜。與以次出。會所分東西立。約正讀鄉約畢。大聲曰。凡我同盟。務遵鄉約。衆皆曰。是乃東西交拜。與各以次就位。少者各酌酒於長者。三行知約。起設彰善位於堂上。南向置筆硯。陳彰善簿。約贊鳴鼓。三衆皆起。約贊唱。請舉善。衆曰。是在約史。約史出。就彰善位。揚言曰。某有某善。某能改某過。請書之。以爲同約勸。約正遍質於衆曰。如何。衆曰。約史舉甚當。約正乃揖善者進。彰善位東西立。約史復謂衆曰。某所舉止。是請各舉所知。衆有所知。卽舉。無則曰。約史所舉是矣。約長副正皆出。就彰善位。約史書簿。畢約長舉杯。揚言曰。某能爲某善。某能改某過。是能修其身也。某能使某族人爲某善。改某過。是能齊其家也。使人人若此。風俗未有不厚。凡我同約。當取以爲法。遂屬於其善者。善者亦酌酒酬約長曰。此豈足爲善。乃勞長者過獎。某誠惶作。敢不益加砥礪。期無負長者之教。皆飲畢。再拜謝約長。約長答拜。與各就位。知約撤彰善之席。酒復三行。知約起。設糾過位於階下。北向置筆硯。陳糾過簿。約贊鳴鼓。三衆皆起。約贊唱。請糾過。衆曰。是在約史。約史就糾過位。揚言曰。聞某有某過。未敢以爲然。姑書之。以俟後圖。如何。約正遍質於衆曰。如何。衆皆曰。約史必有見。約正乃揖過者出。就糾過位。北向立。約史復遍謂衆曰。某所聞止。是請各言所聞。衆有所聞。卽言。無則曰。約史所聞是矣。於是約長副正皆出。糾過位。東西立。約史書簿。畢約長謂過者曰。雖然。姑無行罰。惟速改過者。跪請曰。某敢不服罪。自起酌酒。跪而飲曰。敢不速改。重爲長者憂。約正副史皆曰。某等不能早勸諭。使子陷於此。亦安得無罪。皆

酌自罰。過者復跪爲請曰：某既知罪，長者又自以爲罰，某敢不卽就戮。若許其得以自改，則請長者無飲某之幸也。越後酌酒自罰，約正副咸曰：子能勇於受責如此，是能遷於善也。某等亦可免於罪矣。乃釋爵。過者再拜。約長揖之，與各就位。知約撤糾，過席酒復二行。遂飯。飯畢，約贊起鳴鼓，三唱申戒。衆起，約正中堂立揚言曰：嗚呼！凡我同約之人，明聽申戒，人孰無善，亦孰無惡爲善。雖人不知積之既久，自然善積而不可掩爲惡；若不知改積之既久，必至惡積而不可救。今有善而爲人所彰，固可喜；苟遂以爲善而自恃，將日入於惡矣。有惡而爲人所糾，固可媿；苟能悔其惡而自改，將日進於善矣。然則今日之善者，未可自恃以爲善；而今日之惡者，亦豈遂終於惡哉！凡我同約之人，盍共勉之。衆皆曰：敢不勉。乃出席，以次東西序立交拜，興遂退。

雖其後之效果，未知若何。要可以見明儒對於民人合羣集社之方法之思想。就其條文性質較之呂朱鄉約，則呂朱所言僅爲通常鄉里之人而發。陽明所指則爲南贛特別待理之區。故呂朱祇重在淑身，而陽明則重在弭亂。朱約行禮先謁聖王約立誓先奉神，呂約頗尙通財，王約惟嚴通賊。以是知儒者思想雖號迂闊，要必準情酌勢，以祈因地制宜。初不肯執一概萬削足適履。今之朝訂一法，暮成一規者，大抵出自學校講義，各國成書，絕未實察國情，觀其通變。至於集會通議，則又強令烏合之衆，循行數墨，決之指臂，屈伸之間，黨派方隅意見雜出，潦草成編，唐爲文具而已。嗚呼！

呂朱陽明所立鄉約各有不同，而所同者曰書籍記過。朱約以默觀過籍爲法，王約則昌言於衆，且令酌酒自罰，以常情論之，此必不可行者也。然今之集衆議事者，互訐於黨，喧爭於座，相毆於大庭，羣曳於衢。

踏旁聽者戰指警衛者目笑騰謗報章稔惡專電蓋幾於數見不鮮矣所少者一切議會之法規無自繩其過惡之明文耳無此明文即自居爲神聖雖爲天下人鄙賤斥辱比之畜類亦可掩耳盜鈴行所無事則立一法曰與議者有過必相責必自訟於議者之價值無若何貶損也豈獨無貶損正可以養其廉恥使先有所顧忌而不敢爲非蓋養成高尚之風氣則雖薄罰而亦不啻大辱也夫以怙惡自恣者之心理雖加以毒詈痛撻猶必出死力强辯而不甘自承此豈約史一書遂能使之遽然內訟者然人心之良古今未必相遠苟羣出於至誠惻怛之忱謂若之過爲衆所願分而不幸使若獨尸其咎是感化非懲戒未始不可化莠爲良也

鄉約之法明季猶有行者觀陸桴亭治鄉三約序可見

陸世儀治鄉三約序鄉約也社學也保甲也社倉也四者之名人莫不知四者之事人莫不行四者之中鄉約爲綱而虛社學保甲

社倉爲目而實今之行四法者虛者實之實者虛之綱者目之目者綱之此其所以拳拳矻矻而終不能坐底三代之法也此序作於崇禎

庚辰故知明季各地猶行鄉約之法

桴亭憫其敝根據周官參酌呂朱陽明鄉約之意分教恤保三約以備立法者之採擇明清之交鉅儒宿學論治之書雖多未有及之者也世徒盛稱明夷待訪錄及顏李之書以爲能識治本兼與西方政教原理相合獨未有舉桴亭之書以明中國儒者研究鄉治之法制者洵可謂棄周鼎而寶康壺矣謹爲表之

## 以嚴吾文。

### 陸世儀治鄉三約

治鄉之法每鄉約正一人 周禮國中稱鄉遂野外稱都鄙今制城中爲坊舖城外稱都鄙卽周禮遺意也然可通謂之鄉鄉無長不

可治今擬每鄉立約正一人城以坊舖鄉以都圖爲分域以本鄉中廉平公正宿儒耆老爲之憑一鄉之公舉凡舉約正不可概憑里甲開報須細心探

訪每鄉多舉三四人備加選擇誓於神詔於衆隆其禮貌優其廉給委之心齊而用之寧擇而後用毋用而後擇

約正之職掌治鄉之三約一曰教約以訓鄉民一曰恤約以惠鄉民一曰保約以衛鄉民 教約卽社學之意恤約卽社倉之意保約

卽保甲之意以其總統於鄉約故謂之約訓之惠之又從而衛之教養之義盡兵食之備修矣

以一鄉之籍周知一鄉之事 教長有戶口秀民之籍恤長有常平役米之籍保長有役民之籍以教長之籍知教事以恤長之籍知

恤事以保長之籍知保事據此皆耆民之任既設約正則此皆約正之責不必另設耆民矣或卽以耆民爲約正亦通

歲時月吉率其屬而治會 會鄉約之會也歲時正月及春秋二社爲大會約正率三長聽講約於官府其餘月朔約正自率其屬於

本鄉寬大處所爲之

教民讀法飲射 講約從來止講太祖聖諭亦言習久生玩宜將大誥律令及孝順事實與淺近格言等書令社師逐次講演庶耳目

常易樂於聽聞觸處警心回邪不作其習射則視土地之宜北方弓矢易辦南方卑溼筋角易弛又價高難概以強人其有紳衿子

弟能製弓矢者聽自爲社其餘鄉勇役民令習弓弩亦可然其價值亦須於恤長公費中給之

考其德。行而勸之。糾其過。惡而誡之。德行如孝友睦婣任恤之類。反是謂過惡。勸誡謂有小善小過。則於會中對衆而稱獎訓誡之。

也。其有大善大過。則聞於官府。或於大會時行賞罰。

凡公事官府下於約。正約正會三長議而行之。公事謂錢糧戶役地方公事。

凡民事亦上於約。正而行官府。民事亦公事也。

民有質訟大事決於官府。小事則官府下於約。正約正與教長平之。民間之訟官府理之。則愈禁平之。則竟息者也。嘗見民間有一

小訟。經歷十數衙門而所斷仍枉兩造。傾家又是朝廷所設問刑衙門。較別衙門爲多。而天下未嘗無冤民。且朝廷所設之官。無非日逐爲民間理訟事。而軍國大事則多付之不問。此皆相逐以利耳。非眞爲天下理冤抑也。我明開國之初。每州縣設立申明亭。坐老人於中。斷鄉曲之事。其法甚佳。蓋眞見終訟無益。而欲使民無訟耳。處以約正。亦老人之意也。與教長共平之者。終欲教誨之。不底於法也。

凡鄉之土田出入。謹其推收。掌其稅事。土田有買賣。則有推收。有推收。則有稅事。此一定之法也。今民間歲一推收。每至秋冬過戶。太遲。催辦不便。則民病。或作假契。或賄吏書。彼此扶同。希漏國稅。則官病。今法凡買賣田產者。彼此俱要書。該約正長名氏。取其花押。無者不准買賣。其中金卽分其半。以爲約正長養廉之資。既立契後。卽行推收。過戶使民間無產去糧存之弊。既推收後。卽完官稅。使國家無漏稅之虞。誠兩便之法也。

凡鄉之民事。年終一上於官府。民事謂圖籍之類。三約之籍。三長任其勢。約正主其冊。存其副。而上其正於官府。所以贊治也。

官府受而藏之以周知各鄉之事。天子豈能周知天下之事，賴天下之有民牧民，豈能周知各鄉之事，賴各鄉之有鄉正。此有國家者，所貴乎相助爲理也。

凡三長之能否皆書之，歲終則庀其職事以贊於官府。凡民之善否，三長書之，三長之能否，約正書之。職詳職要各有其司也。謂之

曰贊其三長之黜陟，又非約正所得專矣。

約副三人：一曰教長，以任教約；一曰恤長，以任恤約；一曰保長，以任保約。教長以知書義者爲之，恤長以富厚公廉者爲之，保長以

有智力者爲之，皆聽約正及一鄉之人公舉。

教長之職掌一鄉之教事：教孝、教友、教睦、教嫻、教任、教恤。

主戶口秀民之籍。主謂主其造冊登記之事也，籍成則進於約正，約正受而藏之。職藏者不得記注，職記注者不得藏。

令民十家爲聯，聯有首，十聯爲社，社有師。此卽周禮比閭族黨之制也。聯首以誠實者爲之，社師以學究知書者爲之，皆聽約正同

教長編舉其編聯之法官，以冊式下於約正，約正下於教長，教長下於社師，聯首乃率編戶之民就社師而實書其戶口之數以進

於教長，教長進於約正，約正同教長核實而藏之。上其副於官府，官府據之以爲定籍。編聯之法，不得一字排去，須對面爲佳，并聯首爲十一戶，十聯并社師爲一百一十戶，其

有地勢民居不聯絡者，不妨奇零開載，不必拘之。十數爲一聯，約正主裁，其有寺院菴觀亦須開載。戶口之數最不可不實。此王政之本，致治之源也。施政教興禮樂治賦役聽獄

聽簡師徒行販貨萬事皆根本於此。與今保甲之法略同，但保甲主於詰姦民望而畏之，則多方規避脫漏。今立聯社之法，主於行

教化天下而可有一人自外於教化者乎？故戶口之籍最要詳細確實。其有脫漏作姦者，本戶及聯首社師同罪，甚者罪教長，并及

約正有國者能於此細心致力則治民之道且過半矣雖然有慮焉使長民者而得其人則此法行如明道之治扶溝無一民一物不入其照鑑者也不然呂惠卿之手實法亦去此不遠矣

使之相愛相和親有罪奇妄則相及 此卽周禮之文相愛相和親孝友睦婣任恤之事也相及卽連坐之意然法有當連坐不當連坐者如盜賊姦惡知情不舉之類此當連坐者也其餘隱微之罪作者日應獨承若概連坐則同秦法

以教法頌四境之社師而俾教其童蒙 此卽社學之法也所以端其蒙養使之習與性成而後無不可教之民人人親其親長其長而天下平也社學舊有定制不過使之歌詩習禮以和平其心知血氣而已今則多教之作文誘之考試徒長奔競益壞風俗愚謂文牒之時教童子者當教以朴使人心留一分淳古則世道受一分便益宜令童子凡讀書寫字但從所便各自擇師外惟於每月朔望赴本社社師處擇寬大處所歌詩習禮先聖先賢其有聲容端好威儀閑習者注善有舉止疏忽跳踉不馴者注過習禮既畢教長卽以孝友睦婣任恤之道約舉故事隨宜講導遇講約大會則社師各舉其善者進之於會所官府試其善否而記注之蓋歌詩習禮雖若迂闊然童子無事無善過可考一試之聲容則其人材之能否心氣之平躁可以立見勿謂古人禮樂爲糟粕亦後人未識其精意耳

凡鄉之冠昏飲酒祭祀喪紀教其禮事掌其禁戒 此皆齊之以禮之事也冠昏喪祭有文公家禮諸書斟酌而行之可耳及期將試則書其秀而升之於官 凡戶口術業前冊明載則凡民之秀爲上者已知之矣此復錄而進之便於覽也其教長所書名字有不合於前冊者則罪之



凡鄉之地域廣東輪南及濤塗封漁皆圖之 地圖與魚鱗冊向以屬之畫工及耆正里區今既有約正三長則此爲正長之任矣必

屬之教長者以教長知書而能文墨也 地圖險易所以慎固封守魚鱗圖冊所以分田制賦皆爲國要事而今之長民者率視爲

緩局。卽有知其爲要而行之無法督之太驟地圖則疏脫不準圖冊則作姦滋弊宜用張子厚經界法每三百步立一標竿縱橫四

方成一井字如今地圖之畫方計里以繩約之圖其四至散之則各成方形合之則橫斜曲直不失尺寸不特地形有準而每方之

中步口一定則田畝之數有不待丈量而分毫難遜者此真至簡至妙之良法也細瑣不能盡述詳具於思辨錄中

凡質訟聯首社師辨其誠僞而司其責 凡小民質訟必命書某鄉某社某聯第幾戶某人仍告於聯首社師及四鄰必實有不平始

令之訟如虛僞則聯社俱有罰其證佐非必不可少者毋得越四鄰

歲時月吉則佐約正讀法於會振鐸以令之揚其夏楚而威之辨其美惡爲登之籍 講約既畢約正進父老而問之參稽衆說以定

美惡勸罰教長承命而書之以授於約正凡勸罰量以銀米布帛之類聽約正臨事酌之可也

恤長之職業一鄉之恤事 凡周貧乏恤死喪皆是

主常平義倉粟米出入之籍 常平義倉各爲一籍籍成進於約正與教長同

令民歲爲常平置義倉以供公事 常平之法跡似社倉寄之於高大寺院恤長司其事領於約正地方官長親至寺中作興開導或

量助俸銀以爲之倡恤長設立簿籍勸募本鄉紳衿富戶商家出米多少一惟其願其米俟秋收米價平時聽人先後進倉進倉時

卽面同書之於籍其下注明當時米價若干蓋早晚之間價色有不齊也俟明歲五六月間青黃不接米價或長則恤長聞於官府

請官府及本鄉中好義樂善諸人齊集寺中設法賑糶其法視時價不宜太減太減則姦民乘之而射利矣糶畢後合算米價共得多少還其原本再俟秋收另行勸募 以常平爲母以義倉爲子凡常平有餘息則入子倉其外或一鄉之中有得罪而願出粟以贖者有願助爲公田以濟物者亦設一處公所同收儲監以恤長領於約正俟有公用則聞於官府酌而用之

凡有鰥寡孤獨則聞於官府而養之 國家向設養濟院專爲此四者今恤孤糧是也此項糧米向爲大戶吏書侵沒卽略有給發又大半盡於強乞官府能清釐而整頓之不必煩恤長也但本鄉之中有此等人官府不知須恤長開報約正核實聞於官府然後可以入院

歲荒則設粥賑濟 此不常有之事偶一有之則恤長之職也設粥賑濟向苦無管領之人每縣止設一二處則弊多而法壞矣今既每鄉有恤長則一鄉止食一鄉之人清楚易辦其有流民就食者則官府另爲設法或分食於各鄉亦至便也

夏秋糶貴則以餘米給役民之食 餘米卽義倉中所儲給役民法見保長條下

歲時月吉則佐約正讀法於會會其出入之數驗其貧寡之實而登之籍 出入常平義倉之出入也貧寡役民及鰥獨之類會謂總結一月之事

保長之職掌一鄉之保事 凡水火盜賊之屬

主役民之籍 役民謂一鄉之貧而可役者籍成則進於約正與恤長同

命民五人爲伍伍有夫五伍爲隊隊有士凡鄉之土功皆率其屬而致事 土功謂如築城濬隄修葺廡宇之類

農功之隙以時興修水利則庀其耆耆以聽於官 興修水利地方之要務也古者或因之而置開江軍士亦以其早晚呼集之易至  
約束之易齊耳然總不如役民之法之爲得也

暇則頒以射法教之擊刺習之守禦 射則統矢及弩擊刺則挺刃守禦則城操皆有法則皆宜訓練

國有大故則率其屬而授兵登陣事畢而解城操法另載別篇 凡盜賊水火之患皆司之 謂本鄉之事也

夏秋糴貴則率其屬而受廩於恤長 常平之法止可概之於民若役民則國家之所役無以惠之不可使也但每月給廩力有不能  
宜於五六七三月青黃不接米價湧貴之時每人日給米一升三月共給九斗雖千人之衆每年不過千百所費少而所養多爲可  
久也其費出義倉恤長主之

凡鄉之役事皆與之餼廩而役之 其費總出義倉不足則另爲設處  
歲時月吉則佐約正讀法於會比其勞逸而書之辨其勇力以登於官府 比其勞逸所以均其餼廩辨其勇力或爲戰士或爲官府  
之爪牙也既登之後役民數缺則仍補之

凡鄉之教事責教長恤事責恤長保事責保長三長非其人責約正約正之邪正官府治之 一鄉之中凡聯首社師有不得其人者  
皆須隨時更易不言之者省文也三長不稱職則於年終之時約正白於官府而請易至於約正則必俟歲終合一鄉之公評而誅  
賞不得數數廢置也此亦久任之意也

自黃帝以至朱明鄉治之事迹理想具如右述周官管子以迨元典章明會典皆嘗實行藍田陽明之鄉

約實行於一地而未普及。晦翁梓亭則純乎理想。然覆而按之。文義有出入。而宗旨則一貫。斯實吾國數千年政治之驪珠也。滿清以異族入主中夏。讀書者因文網之密。不談政治。鄉約保甲諸法。視明益敝。湘軍以團練興。徒爲弋利獵爵計。不知自治其鄉。於是古誼淪亡。而歐美政術。乃乘其隙而闖入。迄今雖吸取未盡。而流弊之甚。已無可諱。夫國家者。地方之積也。地方不治。而期國家之治。猶之骸骨腐朽。而欲若人全體健康。此必不可能之事也。吾國治術。在尙德。然民德之迤邐墮落。灼然可見。僅僅鉅儒長德。以其言論思想。補挾偏敝於萬一。已不啻朽索之馭六馬。至並此朽索而去之。縱其猖狂。奮亂。謂可以一新天下人之心志。是則吾所百思不得其解者也。吾嘗謂今之形勢。爲一國執政。易爲一鄉領袖。難爲一國執政。不求澈底之改革。但爲一時粉飾敷衍之計。此稍稍有才器者。能之。爲一鄉領袖。實行今之自治法規。而求其鄉之隆隆日上。猶之蒸砂爲飯。永不可熟。何則。一國之澈底改革。全在。各個縣鄉之澈底改革。各個縣鄉之澈底改革。又在。各個縣鄉之個人澈底改革。執今之議會法。求之。能得否乎。迴心內向。人治其身。自有法在。然而非今所謂法也。

(完)